



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 9



PM Modi-i J&K kübok Nowshera nung sepai den Diwali among

TaFMA-i 'November Blooms' sentong ayongzüksü

VOL. XIX NO. 28 (ADOK 28)

DIMAPUR

ROGONÜ (FRIDAY)

YIMPOKSÜI (NOVEMBER) 05, 2021

₹ 5.00

Nagaland sorkari totzü nung VAT sen 7 ajemtsü

Kohima, Yimpoksüi/ November 4 (TYO): Centre sorkari totzü nung excise duty ajemtsüba dak ajemdaker Nagaland sorkari Brehostibarnü petrol aser diesel nung liter shia value-added tax (VAT) rates sen tenet agi ajemtsüba sangdongogo.

Nagaland Chief Minister Neiphiu Rio-i Twitter ajanga, "Nagaland sorkari diesel aser petrol aser tanga motor spirit tem liter shia nung VAT sen 7 agi ajemtsüba pelashishia sangdonger," ta ashi.

Kasa mapang nung Additional Chief Secretary and Finance Commissioner, Sentiyanger Imchen-i sangdong ka ajanga ashiba agi, Nagaland (Sale of Petroleum and Petroleum

Products including Motor Spirit and Lubricants) Taxation Act, 1967 kübok agüja aliba tashi amshia Nagaland Angh-i state nung ayokba Diesel aser Petrol aser tanga Motor spirit tem liter shia VAT sen tenet ajemtsüogo.

Central aser state sarutem ajemtsüba sülen petrol liter nung sen 12 agi tajemba akümtsü aser diesel liter nung sen 17 agi tajemba akümtsü.

Centre-i Bodhbarnü petrol aser diesel liter shia excise duty sen 5 aser 10 agi ajemja liasü aser iba sülen state aika nung totzü nung jenjang ajemtsüogo.

Central aser state sarutem ajemtsüba sülen Nagaland yimtiba Kohima nung petrol liter nung sen 97.7 aser diesel liter nung sen 81.23 akümtsü.

COVID-19 Nagaland: Taneptsü angur 15 aser tasen puteter 15 liasü

Kohima, Yimpoksüi/Nov. 04 (TYO): Nagaland nung tanü COVID-19 cases tasen 15 aser taneptsü angora 15 liasüm anungji tang tashinung state nung iba tashidak agi meneper ajak agi 31,894 alitsü.

Tanü COVID-19 positive cases puteter tem ya Dimapur district nung 13, Kohima aser Mokochung nung kaka alitsü, ta State Nodal Officer for Integrated Disease Surveillance Project, Dr Nyanthung Kikon-i anogoshi sangdongba COVID-19 bulletin nung ashi.

Kasa tashidak agi menepa alir nisung 15 - Kohima nung 6, Dimapur nung 5, Mokochung nung pezü taneptsü ngua state nung iba tashidak nungi taneptsü angur nisung 29,966 jungogo aser taneptsü anguba rate ya shilem 93.95 alitsü.

Tang state nung COVID-19 active cases 195 alitsü aser item rongnung nisung 21 dak iba tashidak agi timtem agütsüba sümia lir, nisung trok tera timtemer, nisung 9 kanga mejungi kangshir aser nisung 159 dak timtem agütsüba mali, ta pai ashi.

State nung COVID-19 tashidak keter asür nisung 687 lir, aser item nung nisung 15 dak

danga tashidaka keta liasü, ta ashi.

Ajak senteper COVID-19 agi menepa alir nisung 1,046 danga state temi ogo, ta pai ashi.

Tang tashinung COVID-19 tashidak alitsü temolung melemteti state nung sample 397,929 tendangogo. Item ya RT-PCR nung 111,060, TrueNat nung 86,354 aser Rapid Antigen Test nung 2,00,515 tendanga liasü, ta Dr. Kikon-i ashi.

Bodhbarnü tashinung state nung nisung 713,252 nem COVID-19 mozü doses 12,14,406 agütsüogo, ta State Immunization Officer, Dr. Ritu Thurr-i metetdaksü.

Item ya frontline nung inyaker nisung 60,963, healthcare nung inyaker 15,998, arishi küm 45 tema nisung 202,764 aser arishi küm 18 nungi 44 tsüngta nisung 433,527 alitsü, ta pai ashi.

Nisung 501,154 nem mozü dose tanabuba agüja parnok vaccination course tembangogo. Parnok ya frontline nung inyaker 48,013, healthcare nung inyaker 13,389, arishi küm 45 nungi tema nisung 163,144 aser arishi küm 18 nungi 44 tsüngta nisung 276,608 alitsü, ta Dr. Thurr-isa ashi.

BJP sorkari nüburtem tekangshi sentoka toktsür: Assam Congress

Guwahati, Yimpoksüi/ November 4 (Agencies): Assam Congress-i Brehostibarnü, centre aser state nung BJP sorkari tashi arishidang nüburtem timtem tekangshi sentoka toktsüba atema aitsüogo.

"BJP sorkar kanga mazüngi tashi arishidang nüburtem timtem tekangshi sentoka

toktsüogo," ta Assam Congress lenir Bobbeeta Sharma-i ashi.

Assam Congress lenirisa state nung Himanta Biswa Sarma-i aniba BJP sorkar aija, state nung nüburtem anogoshia poksüng aatsü atema kanga timtem tekangshi ajangshidar, ta ashi.

(Maneni tapak 10 nung...)

Pfutsero nung nija meyong mozüki tajung ka lapokogo



Pfutsero nung November 4, 2021 nü Mero Hospital and Diagnostic Center semzükba sentong nung Minister Kronu aser lenirtem tangokba noksa ka yangi angur.

nija meyong mozüki ka kanga nungdaka liasü, ta Minister Kronu-i ashi.

Specialist aser diagnostic facility tajung aginüba yong shirangertem Kohima aser Dimapur bushia yokba atema temolung nung yur, Asür Mero-i molungsoa iba mozüki amenoktsü ratet aser par nija meyong commercial building nung mozüki ya amenoktsü sorkar dang nungi teyari meshia liasü, ta pai ashi.

ECG, Ultrasound, X-Ray machine, Blood Test aser hi-tech operation theatre amala facility aliba mozüki yangi aliba nüburtem aser ano Phek aser Kiphire district nungi shirangertem anepalutsü, ta Kronu-i ashi.

Ajak atema temang anema alitsü ya tongtipangtiba lir, anungji Pfutsero nung mozüki ya kanga nungdakba ka liasü, kechiaser Pfutsero ya yimtsüng tulutem agi müketbanger lir aser Phek district nung nütsüng yongsük shilem 60 shi iba sub-division temeket nung alir, ta pai ashi.

District nung nija meyong mozüki lapokba ya ajanga healthcare facilities tajung tetenzüker asütsü, ta Minister Kronu-i ashi.

(Maneni tapak 10 nung...)

Kohima, Yimpoksüi/Nov. 04 (TYO): Phek district nung aliba Pfutsero sub-division kübok mapang talangka nungi kanga nungdaka aliba aser tanü-asüng facility keter aliba nija meyong mozüki ka November 4, 2021 nü Minister, Planning & Coordination, Land Revenue and Parliamentary Affairs, Neiba Kronu-i semzükja liasü.

Mero Hospital and Diagnostic Center nungja agüja aliba mozüki ya Pfutsero jila tiyong nung lir aser iba mozüki amenoktsü ya Pfutsero Assembly Constituency

nungi taoba mapang minister inyaka alisang Asür L Mero-i nüburtem asoshi pa indang project tatembangba ka ama tenzüka liasü aser iba ya Article 275 (1) kübok Planning and Coordination Department, Government of Nagaland ajanga yarisema liasü.

Iba mozüki semzüksüba mapang, Pfutsero nung government health centre lir, koba tajungba kuma yanglutetsü nungdaka lir, saka nüburtem ajungtsü mechi tanü-asüng technology tasen aser tajung aliba

Chief Secretary-i KAAS Coffee farm semdang



Dimapur, Yimpoksüi/ November 4 (TYO): Chief Secretary Nagaland, J. Alam den Agriculture Production Commissioner, Nagaland, Y Kikheto Sema aser Land Resources Department ketdangsurtemi November 4 nü Sendenyu yimtsüng nung KAAS Coffee farm semdangogo.

Chief Secretary-i, tsüngtong oa coffee ongenba aser process asüba ajangshiba atema kanga pelaba lemsatop. Paisa, inyakyimtem ngua süngmangba aser yimdaklirtemi iba amala mapa inyakba ngua kanga temolung asüba lemsatop.

Alam-i, wara pokteter aliba mapang sorkari terenlok maparen

balala dak rangloker minyaktet saka asenok tangar dak tali metaloker aliba aser rongsenketzüng dak sendakba nung tangar dak memetaloki alitsü atema tenüngdakba aika aliba jangjaogo, ta ashi.

Paisa, sorkar mapa joko timba süngatokogo, anungji lanurtemi tanga lenmang bushia inyaktsüla ta ashiba den coffee tsünüba ya tajanzük akaba maparen asünung pai lanurtem dang iba amala maparentenzüka inyaktsü ajungshi.

Maneni pai, yimdaklirtemi arem kanga junga wazüka ayuba atema parnok nem tenüngsang agütsüba den sorkari takok tashi teyari agütsütsü nangzüka liasü.

Kasa mapang nung Agriculture

Production Commissioner, Nagaland, Y Kikheto Sema-i, Nagaland nung organic coffee tsünüdar, koba state nung dang masü saka bendanglenia belener odar, ta ashi.

Paisa, coffee ya Nagaland nung 1980 nung tsünü tenzüka saka shishilembadak junga sendaktepa maliba aser tanga tetsükdaksüttem aliba ajanga aluyimertemi coffee lu yima aliba toktsü. Pa lenisüba nung 2016 küm LRD-i state nung coffee tanaben tsünütsü aser coffee metsü tapu balala indang angazüksü aser tenem lima temekong tesem nung tsünütsü angazüksü telemtetba agia liasü, ta ashi.

(Maneni tapak 10 nung...)

Mkg Sewak gate-DEF lenmang tekerabanung renemtsü: Er. Limatoshi

Mokokchung, 4 Nov (TYO): Mokokchung Sewak Gate - D.E.F Mokokchung lenmang alima wara majungba den tsüinglu aruba mapang asüba agi khenpika anena atar Nov 3, 2021 nungi osettsüset bendenba maparen tenzükogo, ta Executive Engineer, PWD (National Highways), Mokokchung Division, Er. Limatoshi-i iba osangbener den jembidang metetdaksü.

Iba lenmang (Sewak -Mkg DEF) yanglutsüba ya M/s Trident Enterprises, Kohima-i

agizük, ibai taküm 2021 March nungto order adoka March, April aser May ita tatsüka inyaker mei aruba ajanga khenpika anena ata. Iba lenmang ya sangküm 2022 March tashi nung tembangtsü mapang latetja lir, anungji, iba mapang matongdangsa renemtsü imlar, ta Er. Limatoshi-i ashi.

Lenmang blacktopping yanglutsüba tsiunglu marudang Nov-April tashi ya tajungtiba lir, Sewak Gate nungi DEF tashiji kilometer

ajak senteper 9 lir, DEF nungi Süngkomen Baptist Church Staff Quarter tashibo (aji 4 KM shi asütsü) yangluogo aser ano kilometer 5 shi yanglutsü anüngdaka lir aser joko tanü nungi osettsüset bendenba maparen tenzükogo, ta paisa shisem.

Iba lenmang ya tetenzük nungi district administration, Ao Senden aser All Ward Union Mokokchung Town den angatettepa inyaka arudar aser ano maneni yamaji inyaka aotsü, ta paisa shisem.

SAYO, NAYO, WAYO & CYO ajanga khukhua aitsür

Dimapur, Yimpoksüi/Nov. 04 (TYO): Angami Youth Organisation (AYO) indang tzükong pezü, Southern Angami Youth Organisation (SAYO), Northern Angami Youth Organisation (NAYO), Western Angami Youth Organisation (WAYO) aser Chakhroma Youth Organisation (CYO) ajanga sangdong ka nung October 30 anepdang 1st Assam Rifles temi Roko Angami'er ki mita bushiba asoshi khukhua aitsüogo.

Roko Angami ya sempet alakteta aliba nisung ka lir, shibai saisapong tsütsü international jenjang nung linük tenüing nung shilem agia aruba aser pei aliba tesem nung züingzünga nübur tenzükba nisung ka lir, ta ashi.

Iba linük nübur kumzükä ayutsüba mapa nunglokja aliba 'uniformed personnel' kasai tejangja nübu aser lenir ka dak iba tashi inyakba ya ajanga nüburtem kechia tia nung yutsür? ta asüngdang.

lenir aser ozüing sülen anidakba senso ka amokmerentsüsa itdangiterba osang ya 1st Assam Rifles-i temai adoktsüsüla. Iba inyakyim nung osang agütsürji Angami kin nungi asünungbo, pa/la nem asen sobaliba nung aliba ama timtem ajurutsü.

3. Tatemsa onoki akhangba ama meinyak tashi AYO indang tzükong pezüi 1st Assam Rifles den Angami nung aliba tesem aser danga tesem kechia nunga parnok den amalitep malitsü telemtetba agiogo. Iba tensa nungi nüburtemi maginütsüsa aser masüba kar danga atalokra, ibaji 1st Assam Rifles khuret asütsü.

Roko Angami ya NAYO tir lir aser taoba mapang AYO indang auditor general inyaka liasü.

Iba tatalokba tarensen kanga junga asadanga sülen SAYO, NAYO, WAYO aser CYO ajanga item mera ya agitsü telemtetba agi:-

Temalen shia aliba onüktem nung 1st Assam Rifles puri ochishia inyaksü tim, ta onoki amanger. Yamaji süaka tesüiba mapang AFSPA ozüing kübok mapa tamajung inyakbatem aser 1st Assam Rifles temi meshidak inyakba nübur matsüngdang menembangtetsü. Item telemtetba aser mera agiba ajak ya AYO den asüngdantepa inyak, koba Angami kin nung lanurtem tentet tulutiba lir, ta sangdong ajangasa ashi.

Iba maparen ya ajanga ochishir, ozüing sülen anidaker aser lokti tenzükba senso ka tenem nüburtem indang tembartemi temolung malemba mechi mapa tamajung inyaker ka ama amshiba sayur, ta sangdong ajanga ashi.

1. Iba ama tahishitsü aketba mapa inyakba atema 1st Assam Rifles ajanga kuli tejangja sangdongtsüla aser Roko Angami dak mesüra par kidang tai aputsü kuli kechia meliasü ta nangzüksüla. Aser itemji temai adoktsüba mapang 1st Assam Rifles ajanga ozü kin aser talisa Roko Angami dang temolung taroktiba nungi aser ochi molungsentsü nung tatok meshitsüla.

2. Tiazü osang sangokja aser senpet agütsü.

Iba Otsüno tetoktepba nung takok anurtem nem tenüngsang agütsü.

Ibai 1st Assam Rifles pur temolung melemtetsüsa itdangiterba maparen ka süang mesüra tapi agi AFSPA 1958 tashi amshiba süang, saka katia parnok inyakyim memetentsür.

Noklak nung Otsüno tetoktepba nung takok anurtem nem tenüngsang agütsü



Noklak, Yimpoksüi/ November 04, 2021 (TYO): Gandhi Jayanti, 2021 anogomung nüngtem nung, Raj Bhavan, Kohima den District Administration, Noklak longjemer "Relevance of Gandhiji's thoughts for building a peaceful and prosperous Nagaland" omen nung ajemdaker ayongba district level Otsüno tetoktepba sentong nung takok anurtem nem tenüngsang agütsüba den sempet agütsüba sentong agiogo, ta sangdong ajanga metetdaksü.

(01.11.2021) DC's conference hall, Noklak nung sentong ka agia liasü.

Iba sentong nung, Deputy Commissioner Noklak, Hiazu Meru-i, Gandhiji indang tesayubatem metetdaksü aser item tesayuba nung anidaktsü aser amshitsü asoshi telok ayongzük.

Otsüno tetoktepba nung shilem tajung agiba atema Meru-i pelaba metetdaksü; aser iba sentong atema school nung tekolakpurtemi junga ketdangsüa kaketshirtem ajungshiba atema Meru-isa tekolakpurtem dang pelaba shisem.

District Level (Noklak) Otsüno tetoktepba nung takok anurtem atema, Hombarnü

Iba sentong nung, Deputy Commissioner Noklak, Hiazu Meru-i, Gandhiji indang tesayubatem metetdaksü aser item tesayuba nung anidaktsü aser amshitsü asoshi telok ayongzük.

Iba sentong nung SDO (Civil) Noklak C.Phuniang menden liasü. Kasa sentong nung EAC, Pukha Lam-i takok anurtem tenüng telok dang metetpeladaksü. Iba sentong nung sorkar ketdangsürtem, school tekolakpurtem, reju balala nungi kaketshir aser tekolakpur den telok- tentet balala aruagi denogo, ta kasa sangdong nung shia lir.

River Belt Colony, Dimapur nung IT oset ayokba dokan ka semzük

Dimapur, Yimpoksüi/Nov. 04 (TYO): Brehostibarnü Minister, PWD (Housing), Tongpang Ozukum ajanga Don Bosco Higher Secondary School anasa River Belt Colony, Dimapur nung computer aser IT dak sendakba dokan, Matrix Enterprise semzükja liasü.

jenjangi ajungkettsüla, ta pai ashi. Ano paisa Kent Cameye ta süir vehicle security system ka lapoktsü, koba Northeast nung mezüingbuba alitsü.

Iba dokan semzüksüba mapang, tanü lima nung rongsenketzüing ya yimya, mapa aser sentong tasentem ajanga ajangzük aser tejakleni aotsü shisadanga nisung dak nungi adoker, shirnok mapa inyaksü shia lir aser temolungtetba nung lir, ta Minister Tongpang-i ashi.

Matrix Enterprise kibur Tiasunep Ozukum-i ashiba agi, dokan nungya Office supplies, Stationary items, Invertors aser batteries, electronics aser security system amala IT osettem ayoktsü aser service agütsüsü.

Asenoki lanurtem rongnung entrepreneurs jenti angur, shirnoki alima dang parnoki meranga inyakba ajanga takum liteter ta sayutsü meranger. Iba amala entrepreneurs ya ajungshitsüla aser temaba

Danga dokantem ten medemdanga yangi osettem talangba agi angutsü aser oset brand ya Dell, HP, Lenovo, Acer, Asus, Apple, Intel, AMO ryzen, Geforce, Canon, Epson, Produt, CP Plus, Microtek, Amaron, Exide, JBL. Infinity, Bose, Sony, Samsung, Benq, Microsoft, Quickheal, Logitech, Seagate, Toshiba, WO eleme'nt, SanDisk, Alexa, Lipi cartridges aser Vertel Walky talky tem alitsü, ta paisa ashi.

Longkong nung metsüjang alemba sentong agi



Dimapur, Yimpoksüi/Nov. 04 (TYO): Agriculture Technology Management Agency (ATMA) Mokokchung, Chuchuyimlang Block ajanga India nüjiso ngur küm 75 ajungba "Bharat Ka Amrut Mahotsav" nüngtem nung Field day aser Kisan Goshti sentong ka November 3, 2021 nü Longkong yimdak agia liasü.

Chuchuyimlang Block ajanga Rabi season nung aonsotsü lu ayimba tajangzük indang jembia liasü.

FIGs, SHGs aser FSGs tem temaba jenjangi ajungkettsü mechi iba sentong ya ayongzükä liasü.

Paisa mongpu nung aonsotsü tabu balala tsünüba yimyatem rateta shia liasü.

Iba sentong nung Longkong yimdak nung telok ana, Sonan FSG aser Lenden FSG nungi shilem agia liasü.

Tanabuba session ya Field day nung agia liasü, kong shisalen sayur Aolemla Kichu, BTM, Chuchuyimlang Block ajanga mongpu nung aonsotsü tsünüba yimyatem, talisa nursery bed yangluba aser iba sülen nursery bed nung metsüjang atemba indang mapa inyaka sayua liasü.

Iba sentong mezüingbuba session ya "Distribution of winter vegetable seeds cum Kisan Goshti" onük nung ajemdaker agia liasü, kong shisalen sayur Tangit Longkumer, ATM

Iba sentong nung aluyimer 18 aser ATMA nung inyakerkem dena liasü. Iba sentong nung "Bharat Ka Amrut Mahotsav" nüngtem nung Sweet corn, Cabbage, Broccoli, Carrot, Knol Khol amala metsüjang aluyimer nem lema agütsü.

Dimapur Press Club ajanga asükhu lemsatep

Dimapur, Yimpoksüi/Nov. 04 (TYO): Dimapur Press Club nung executive züingsem Moa Longkumer tebu Takodong Ao, November 4, 2021 nü Dimapur nung asüba osang angashia Dimapur Press Club (DPC)

ajanga mangyim tejangshi lemsatepa liasü.

Mangyimer kibong den DPC-i asükhu lemsateper. Asür tanüla tesunep nung anisüngzükjangma, ta DPC sangdong ka ajanga ashi.

Assam CM-i Dispur Supermarket flyover lapoktsüogo



Guwahati, Yimpoksüi/ November 4 (Agencies): Guwahati yimti nung Dispur Supermarket flyover Brehostibar anepdang gari senzüsenpongtsü atema lapoktsüogo.

Assam chief minister Himanta Biswa Sarma-i, yimti kübok Dispur, GS Road nung km 1.21 talang T-shaped flyover ya Brehostibarnü lapokja liasü.

Sen crore 127 intoka yangluba double-lane flyover yagi Dispur aser Six Mile na sendakteptsü aser ano Supermarket aser yimti nung Last Gate na sendakteptsü.

Chief minister Sarma-i

flyover lapoktsüba sentong nung ashiba agi, iba lenmang ajanga iba tesem nung gari senzüsenpong tesademba akümtsü imlar.

"Ita 36 nung yangluzüksü mapang atakzüka yur tenzükba ita 22 nung tembanga inyakba ajanga ozü sorkari infrastructure terenlok asoshi takaratiba nung maparen benoka inyaktsü merangba sayur," ta pai ashi.

Project estimate ajanga iba flyover ya 2022 küm December ita-ang renemtsü ta asateter liasü.

"Diwali benjung amungba anogo iba flyover nung gari senzüsenpongtsü atema

lapoktsüetba atema ni kanga pelar aser iba lenmang ya nüburtem atema lapoktsüogo. Apu tasenba ajanga nüburtem senzüsenpong nung tetsükdaktsü adoka aliba tajemba kümdaktsütsü. Maneni ni ajak tang apu tasenba nung metzü memetsütsü mepeshir," ta Sarma-i ashi.

Flyover ya Dispur nung Janata Bhavan nungi tenzüktsü aser Down Town police point nung tembangtsü.

Last Gate nung gari longer aoba (Golchakkar) nokdangtsü atema right-side bifurcation Dispur Supermarket junction nung tenzüktsü.

Tebendang makai ken o bushisüngdangdar: Tripura police

Agartala, Yimpoksüi/ November 4 (Agencies): Tripura police-i Brehostibarnü ashiba agi, parnok tawa state nung tamangba yimsü lokti tentet balala tsüngda mangatettep adokba, kecha tebandanga makai bushisüngdang südar.

Tripura police-i ken o bushisüngdangba nung tebandang keta inyakshitsü akok ta temulung melemi bilemba osangtem social media nung nisung kari lemsatepba sülen Tripura police-i iba telangzüba agüja liasü.

"Tawa tamangba yimsü lokti tentet balala tsüngda mangatettep adokba dak

sendakba nung Tripura police-i ken o bushisüngdangba tebandang keta inyakshitsü akok ta temulung melemi bilemba osangtem social media nung lemsatepba nguogo. Police temi iba ken o kecha tebandang makai aser temzüng ozüng kübok bushisüngdangdar, ta jangjatsüner," ta Tripura police-i ashi.

Police-isa, "iba tatalokba nung densema aliba potetertem anema jenjang tapet agidar," ta metetdaktsü.

Maneni Tripura nung police-isa, tang tashi nung iba ken o nung nisung trok puogo, shirnok tatalokba balala nung densema liasü, ta ashi.

Social media post tem dak sendakba nung nisung kar anema ken o benokogo, ta Tripura police-i ashi.

"Yashi North Tripura district (police)-i nisung pezü puogo. Par pezü ya tamangba yimsü lokti tentet ana tsüngda tesempatem adokdaktsütsü nükjidong nung olulu osang balala prokshiba atema aija puogo," ta police-i ashi.

Maneni Tripura police, "onoki maneni social media nung kuli tejangja makaba osang balala prokshiba dak tamang makatsü aser item amala post ya melemsatsü aser like masütsü mepeshir, kechiyong iba inyakyim ya ozüng alema lir," ta ashi.

Bypoll sülen BJP-i excise duty ajemtsütsüsa dang aküm: Congress

Guwahati, Yimpoksüi/ November 4 (Agencies): Petrol aser diesel nung excise duty ajemtsüba sülen Centre tiluja Congress-i Brehostibarnü ashiba agi, bypoll result sülen sorkari iba jenjang agitsüsa dang aküm, kong Himachal Pradesh amala BJP-i yimsüsüa aliba state tem nung BJP pur kanga mejungi tamakok nguogo.

Congress MP Gaurav Gogoi-i, petrol aser diesel nung saru ajungketba ya vaccine angati agütsütsü atema intoktsü atema lir ta ashiba sülen ita ishika lir BJP puri tang parnok anemtsü inyakyim meyokzüka yoker jenjang tera ajemshitsüogo, ta ashi.

"India nung aliba nüburtem khen atema tera anisüngzüko. Rahul Gandhi-i inflation dak sendakba nung sorkar aitsüba sülen iba ya atalokogo," ta Gogoi-i ashi.

Congress otongdar tongtiba Randeep Surjewala-i, "saru dak metaloker aliba Modi Govt dang ochiji kechi aji sayuba atema nüburtem dang pelar! Saka bye-election 14 aser Lok Sabha 2 makokba sülen Petrol-Diesel jenjang sen 5 aser 10 agi ajemtsüba ya Modi indang

Diwali sempet ta züngshidar," ta ashi.

Paisa, 2014 küm May ita petrol jenjang liter nung sen 71.41 aser diesel jenjang liter nung sen 55.49 liasü saka crude Oil-bo barrel nung USD 105.71 liasü, ta ashi.

"Crude Oil jenjang sen 82/ Barrel lir, kodang 2014 küm ama jenjang akümtsü? Congress sorkari Petrol nung saru liter nung sen 9.48 aser Diesel nung sen 3.56 meshia liasü," ta pai shisem.

Pai ashiba agi, petrol nung excise 28 shi aser diesel nung 22 shi lir, ta ashi.

Saru ajemtsüba sülen Delhi nung Brehostiba anepdang 6:00 ako nung petrol jenjang liter nung sen 103.79 liasü, koba yashibo liter nung sen 110.04 liasü.

Yimti nung diesel jenjang liter nung sen 86.67 kümogo, koba yashi tashi liter nung sen 98.42 liasü.

Centre sorkari Bodhbarnü November 4 nü nungi tenzüka petrol liter nung sen 5 aser diesel liter nung sen 10 ajemtsütsü ta sangdongba sülen linük kübok state ajak nung totzü jenjang ajemogo.



Guwahati, November 4: Brehostibarnü Guwahati kübok Panbazar nung mi adokba sülen mibener kati mi temsepbba noksa nung angur. Mi lendong ya Guwahati Railway Station anasa atalok, kong ki ka rongtoka liasü. Mi ya Diwali benjung atema tsükloka ayuba 'diya' tem nung adok asütsü ta temulung melemi bilemer. Ajisüaka iba lendong nung nisung asüba osangbo mali.

Meghalaya & Assam CM-i arrtsü semdangtsü

Shillong, Yimpoksüi/ November 4 (Agencies): Assam Chief Minister Himanta Biswa Sarma aser Meghalaya Chief Minister Conrad K Sangma nati arrtsü nung mangatettep adoker aliba tesem kar külemi semdangtsü imlar. State ana tsüngda mapang talanga arrtsü dak sendakba nung mangatettep adoker aliba bentettsü nükjidong nung item tesemtem semdangtsü asatetogo.

Osang ajanga ashiba agi, Assam aser Meghalaya na tsüngda arrtsü nung tesem 12 nung mangatettep adoker lir, ajisüaka CM anati külemi arrtsü semdanga aoba mapang kangabo tebenja maliba tesem trok dang semdangtsü atema shimogo.

"November 15 nü CM anati semdangtsü atema onoki tesem ka mesera ana shimtsü," ta Meghalaya CM-i ashi.

"Ajisüaka iba sentong asoshi anogo tejangja ka lateta mali, kechiyong künaprongla iba mapang nung sentong balala nung shilem agitsü renema lir," ta paisa ashi.

Taoba mapang state anati shimtsüba regional committee tem nem state ana tsüngda arrtsü nung mangatettep adoker aliba tesemtem külemi semdanga yimdaklirtem den sensak asemtsü, aser parnok tebilemba mangaoka ayutsü aser October 30 nü tashi nungbo osang agütsütsü nongloksüogo.

Ajisüaka state anaprongla cabinet-i regional committee tem nem parnok osang agütsütsü atema hopta ana mesera asem mapang talila apuloktsütsü telemetba agiogo, kechiyong state anaprongla nung by-election agiba ajanga inyakyim nung tetsükdaktsü adoka liasü.



Guwahati, November 4: Totzü nung Central Excise Duty ajemtsüba Centre-i sangdongba sülen anogo ka lir Brehostibarnü Mizoram aser Arunachal sorkari petrol aser diesel nung saru (value-added tax rates) ajemtsüogo. Arunachal Pradesh sorkari tang petrol nung saru shilem 20 agia aliba 14.5 aser Diesel nung shilem 12.5 aliba shilem 7 kümtsüogo aser Mizoram sorkari petrol aser diesel jenjang sen 7 agi ajemtsüogo.



TIR YIMYIM

YIMOBILEM (EDITORIAL)

DIMAPUR

ROGONÜ

YIMPOKSÜI 05, 2021

Saru aser Terenlok

- Tangsen Lemtur

Kechiba sorkari kechisarena nung saru agir? Saru bendenba jagi kechisa inyaker? Nüburtemia sorkar dang nung kechi imlatsüla? Itemji jungjunga angatet nungbo aikati süngjema melitetsü. Tang India nung GST (Goods & Service Tax) kübok Centre sorkari chiyungtsü, osettsüset aser service balala atema saru shilem pezü- 5%, 12%, 18% aser 28% lemsar agir, koba dang 'tax slabs' ta ajar. Ano petrol aser diesel nungbo central saru aser states saru senteper shilem 50 dak tema agir. November 4 nungi Centre aser state sorkartemi gari totzü jenjang ajemer dang-ashi state kar nungbo petrol litre ka nung sen 120 tashi tur liasü. Tatishitsü agi Centre-i petrol litre ka shia nung saru sen 33 shi agir aser state temi litre shia nung saru sen 22 shi agira petrol litre ka nung saru kija nung sen 55 shi adoker. Tetezü nai sen 2,000-i petrol aliba shia sen 1,100 shibo saru agütsür! Anogo ana-ase m tashi anogo shia petrol litre ka nung poisa 35 atu nunga tanga state tem nungbo anogo shia telok karibosa longkak aitba asenoki angashir, saka asenokibo kenüyongi petrol litre ka nung sen 10 tashi atuyonga au ta malitsü südi. Asenoki süoki ia magir dang-ashi anogo shia asenoki tapu meyina nung sorkar nem saru agütsüdar. Sorkari bendenba saru nungjagi sorkar mapa inyaker nem itasen agütsür aser nüburtem anisüngzüksü atema maparen balala inyakra den lenla balala nung terenlok mapatem inyaker. Talisa saru ajanga sorkar school aser mozü kitemji nija school aser nija mozü kitem den toktepbba tajungba asütsüla aser gari lenmang kanga junga menoktsütsüla, saka asen lima terenlok mapatem jagi tangar memeneper. Saru agütsüba aser sorkari inyakra na jungjunga medemdangra asenoki ola madoki melitetsü. Nüburtem asoshi terenlok mapa balala inyaksütsü asoshi sorkari nija mesüra tentet balala dang nungi parnok i ajangzüktebba nungi shilem kar saru agir aser ibaji sorkar senpongi ayir, koba ajanga nübur asoshi terenlok mapa balala inyaker. Kodang saru sarutetba dang nungibo sorkar senpong nungi sen teindokba timba südir sentsüh ang tsüloker aser terenlok mapa-a awaa oa meinyakteter. Ibayongji saru tim tagütsütsü shitak agütsütsü asoshi sorkari mapang shia ozüng tapet yanglur. Ano külen India nung pei ajangzüktebba rongsen mimshia saru magütsür takar aika lir, ibayongji NDA sorkari ochimashi sen rizüngba anema mera aika agia inyaker. Ashiko, India nung ajaki saru tim tagütsütsü agütsü nungbo sorkari yimtembo yutsür yimtsüngtem nunga lenla ajak nung terenlok mapa jenti inyaktetla. Senso tajung ka ama asenoki sorkar nem saru tagütsütsü tim agütsütsüla, aser sorkar dang nungi terenlok imlatsüla. Asenoki saru shidak agütsüra sorkari mapa shidak meinyaksüba atema ola adoktsü asenok dak temeden lir. Democracy linük ka nung kodang nüburtemi sorkar inyakyim mita reprangdir aser ola adokdir terenlok alitsü, ochimashi ajemtsü, sübokrem agiba ajemtsü aser sorkar ketdangsertemi meshitaki inyakra mapatem azüoktettsü. Kodang gari lenmang nung ongken melilir, kodang light junga arudir, kodang sorkar school aser mozü kitem tajung lidir, kodang itasen shitak agütsüdir aser kodang Centre nungi yokba sen shitak amshidir idangji ang 'terenlok aliba lima' ta züngshitsü.

Aor Khristan aser Aor Sobaliba

Rev. S.Temjen Lkr, Chumu.
Ph : 7630980884

Idaki agüja aliba onük amala nung ratamata jembiba aiben angashir. Aser nisung karibo taoba mapang Osangkaket nunga adoktsüba nuogo. Asenok ajaki metet Sobalibaji onük tulu, ajak rasa zülu nungbo kakat tulu ka asütsü. Saka idakibo tongtibangsa Khristan Tamang tsütsü tesendaktep indang tang kar tatsü agi lemsateper.

a) Sobaliba Temelenshi

Asenoki metet Sobalibaji nisung den lir. Nisung melenshira, pai aser lai benshiba sobalibajia melenshir. Kodang Ao limai khristan Tamang yimsü aru, Aor sobaliba nung temelenshi adokdaksü. Sobaliba kobasa Khristan Tamang Yimsü den meputep aji endok. Tongtibangsa temesepba chiyungtsü aser song-long külemba maparen. Ano akhi putu nungbo Amung-tsü mung aser külemkeja ajak agi 60 shi liasü ta ashir. Saka item ajak endoker tanübo asenoki ana tang shimteta amunger. Anaji Moatsü aser Tsüngrem Mung (May, Aug.). Iba Amung Ana Benjong Sentong metenzük dang Yimtsüng aika nung tamasa Pastorbai sarasademer, iba sülen sentongtem agiyonga aor. Tanübo iba Amung Ana ya Khristan Sobaliba kümogo. Kechaiesr nisung melenshiba agi parnok benshiba sobalibajia melenshitsüsa akümer. Aser aji tanü putu tensa den tapet lir.

b) Aor Sobaliba /Tetsü-tebou Kensü

Alemli nungi asen Aor tetsü-tebou nem Tsüngremi Kensü tajung agüja lir. Asen Sobaliba (tetsü-tebou) kensüji tai-temenen kensü masü. Ibai Kotaker Tebu nungi anguba sempet lir. Aser tajung kaji tetsür kensü aser tebur kensü, kensü tapu balala. Anungji akhi tsürabur kensü nungji khristan ken tajung mejema atentsü nüngdaker. Asen Aor ken ashir, ken meteter temi asen sobaliba (tetsü-tebou) kensü nung Tsüngrem tenüngsang ken tajung mejema, telok karibo tekülem sentep nung Special Number ama ken aten nungbo tekülem sentep nung atener aika tanela temoatsü angutsü ta imlar. Tanü tashi iba yimyaj i tenteta makaba agi asenoki ratamatar aser karibo tai amai bilema altisü akok saka yamaji meblemetsüla. Asenok tangatetba melenshitsü nüngdaker.

"Dr. E.W. Clark aser Pa den külemi inyaker tejin missionary temi mezüngbo Khristan ken aika Aor Sobaliba kensü nung meyipzuka sayutsü tenzük aser 1950 tashi tantsür-tambur temi itemji tenshia aru" ta late Prof. Dr. Renthly Keitzari ashir (ABAM Seminar Paper, Impur, 1983). Aser aji shitak ta ni kuli asür kechiaser 1940-45 tsüngda ni tanur asüdang kütsüi Aor Sobaliba kensü nung Khristan ken tatsüka temolung agi atenba ni angazüka lir.

Ano Dr. Clark aser tejin missionary temisa Aor Sobaliba kensü nung Khristan ken 3 bo Ao ken kakat nung enok. Aser ken kabo omen (heading) Ao Naga Tune ta zülu. Iba jagi parnokibo Khristan kenji asen sobaliba/ tetsü-tebou kensü nung atentsü ajungshi aser leman tuyu ta kuli tejangja angur. Item ken 3 ji Dr. Clark mapang nungi Ao Ken Kakat nung enoker aruba 1990 tashi Ao Ken Kakat nung enoka liasü. Saka tanübo itemji mangur. Asenoki mangatet, mejangra aser kodanga tenshia maruba agi itemji samadaksüogo, ya koda tesasatsü.

c) Aor Sobaliba Sobosolemtsü

Aor sobaliba sobosolemtsü ya onsara tobur tajung aser mera taket lir. Asen tsüraburtem limapur nung iKhristan akümdang, khristan sobosolemtsüji tera balaka ama parnok i bilem, kechiaser khristan Tamang Yimsü ya anülulen alirtemi bener aru aser parnok sobosolemtsüji balaka ta asen tsüraburtemi ajitet. Anungji parnok i mezüng agia aliba sobosolemtsü temji tera memeshiba ama bilemadok aser aji sobotsü tera ratamata aküm. Saka tanübo asenoki yamai angatetsü nüngdaker. Nisung dak tang tai-temenen ali ashi aser asen sobaliba sobosolemtsü dak memeshiba kecha mali. Asenok Khristan kümra, asen sobaliba sobosolemtsüjia Khristan kümdaktsütsüla, tetezü, itemji meshiteta sarasademer Tsüngrem tenüng sanga amshtisüla. Shir kin, shir nübur khristan kümdir, par sobaliba sobosolemtsüjia khristan asütsü tim (our culture needs to be baptized into Christianity as we are).

Asen Aor Ayak, Maitisü (Identity) asem lir, (1) Tetsü oshi, (2) Sobaliba (tetsü-tebour) kensü aser (3) Sobaliba sobosolemtsü. Itemi mesamadaktsütsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger i angateta agitsü mepishir

Faith Theological College pur Graduation sentong agiogo



Dimapur, Yimpoksüi/ November 4 (TYO): Faith Theological College pur 12buba graduation sentong November 4 nü FTC campus, Ura Villa colony nung agiogo.

Iba sentong nung tongti o jembir, Fellowship of Naga Baptist Association (FNBA) General Secretary Rev. H. Gideon liasü aser alakteta jaoker, Advisor Industry & Commerce, Labour and Employment, Skill Development & Entrepreneurship, Imnatiba liasü.

Graduation sentong ya correspondence kaketshirtem atema ayongzüka agiogo, kechiyong mapang agi memelaba ajanga kum tetenzüklen graduation sentong nung parnok shilem magitetsüsa aküm.

Taküm correspondence kaketshir parnok 20 graduate süogo. Kaketshirtem ya B.TH

course, M.DIV course aser M.TH course nung graduate süa liasü. Parnok rongnung timba sorkar tenzükertem aser Arogo balala nung tenzükertem densema liasü.

Tongti o jembir o jembiba mapang pai Mosa taküm otsü ajanga kaketshir aser sentepa aliba lokti ayongzüka liasü.

Paisa, degree mesüra jenjang dak masü saka Tsüngrem dak rangloker inyaksü aser Tsüngrem madenba sentong süra degree ajaki tazüngla ta ashi.

"Tsüni-i san tsübur masü saka san-nüker tsübur, yamaji mojingi asenok tsübur masü saka kibur asenok den ali tashibo pa asenok anasa marutetsü," ta shia Rev. Gideon-i Tsüngrem dak metaloker inyaksangshitsü ayongzük.

Kasa mapang nung alakteta jaoker Advisor Imnatiba-ia,

graduate asüba kaketshirtem dang tamangdir kaka akümstü, Tsüngrem juli benshir kaka asütsü aser tasü ita Tsüngrem tenzükera kaka ta shitetba taküm alitsü merangang ta shia ajungshi.

Tanü Graduation sentong ya M. Th lecturer Kasudi Gangmei lenisüba nung agi aser lokti pelaa agizükba o Founder Principal Rev. Dr. S. Gangte-i jembia liasü. Maneni degree agütsüba sentong Principal aser Academic Dean nati achaayanga agi aser Er. Dr. L. Yezhekhu Sumi-i tepela anküp o jembia liasü.

Faith Theological College ya correspondence kaketshirtem atema 2003 kum tenzük aser 2009 kum Residential programme-a tenzük liasü. Taküm tashi nung iba college nungi kaketshir 300 dak tema graduate süogo.

Nov. 7 nü 'Intl. Day of Prayer for Persecuted Christians' amongtsü

November 04, 2021: Taruba Amongnü (November 7) alima tesem ajungalen Khristantemi alima tesem balala nung reshikangshi tia nung aliba adianu Khristantem bilemteta amongtsü.

Linük balala nung reshikangshi tia nung aliba aianu aser adianu Khristantem atema bilemteta sarasademtsü atema kum 20 tejaklen International Day of Prayer for Persecuted Christians (IDOP) ya tenzük liasü.

Tawa CBN Prayer Link-i interview ka agiba mapang nung Open Doors USA nung Tir aser CEO, David Curry-i taruba Amongnü iba anogomong nung Arogo ajaki shilem agia sarasademtsü mepishia metetdaksü.

Curry-i, "Yisu Khrista dak amangba atema tang alima nung Khristan million 340 dak tema reshikangshi tia nung lir. North Korea ama linüktem nungbo nü ket nung Laishiba ali nunga na arrshi piyong tepuokdak ayutsüa

akok, mesüra tepsettsüa akok," ta ashi.

"Ano alima nung Khrista osangtajung anemba tesema aika lir. Na amokmerentsüa akok mesüra tsübuwa alitsü. Yimsü amangba atema reshikangshi tapu aika lir," ta pai ashi.

Küm shia alima nung Khristantem tamajungba reshikangshiba linüktem asadangba (World Watch List) ya David Curry-i tenzük liasü, aser pai ashiba agi, nungdakba Khristantem nem teyari balala agütsütsü atema Open Doors-i alima tesem ajungalen team aika yoka lir.

"Onoki item tesemtem jagi oa parnok nungita yarir," ta pai ashi.

"Sarasadem ya kanga tongtibang, aser nisung kar yaritsü atema sarasadem nung shilem agitsüla," ta pai ashi.

Open Doors USA tenzükba sülen kobi melii kum 70 ajungtsü, aser taküm November 7 nü parnoki online ajanga

International Day of Prayer for Persecuted Christians sentong ya ayongzüka agitsü.

Iba anogomong sentong nungsa Release International, Christian Solidarity Worldwide aser The Evangelical Alliance densema telok aikati shilem agitsü.

International Day of Prayer nung Khristantemi North Korea, Afghanistan, Nigeria aser China densema Khristantem reshikangshiba linüktem nung Khristantem atema sarasademtsü.

Alima tesem balala nung pastor tem aser Khristantem pua tepuokdak ayur aser Arogotem anema inyakba kanga bulua ataloker. India nunga Khristantem kanga amaker aser Hindu nationalist-i Khristan charity teloktem anentsür.

Iba anogomong nung shilem aginertemi Pray for the Persecuted app download asütsü akok aser sarasadem onüktem agizüktsü akok.

ANO GO ABEN TSÜNGREM DEN

Asenok jungkai adokba ajanga alir

Kong ainkar sayutsüngi mali, nübur tesoetba mali saka shibai ozüng benshir pa temoatsüba. A. Shin 29:18.

Alimaji mangdang agi anir. Tsüngremer nübur jungkai adokba ajanga alir. Alimai nükitong aser alizüng atongtsü bushir. Nüburtemi tulutiba aser jangratemtsü temulung asütsü bushir koba asoshi parnoki parnok taküm yutsür. Institutionsi alizüng ayur aser ibaji tongtettsü asoshi parnoki tentet tentetter. Tsüngremer nüburi lemang balaka nungi inyaker. Khristantemi parnok taküm Tsüngrem jungkai adokba nung yanglur. Asenok tarutsü taküm asoshi kechi tajungtiba asütsü ta bilemer ta Tsüngremi asenok tebilemba masüngdang. Pai asen nungdak metetta kar. Tsüngremi asenok nungi aginüba Pai Pa mulungjang nung aliba jungkai adoktsüba aser asenok asoshi Pai mulungba kechi lir iba nung asenoki temulung agütsüdaktsüner, kechiaser Tsüngremer lemangtemji asenok lemangtem masü! (Isa. 58:8-9).

Kodangsa nüburi pei taküm Tsüngremer jungkai adokba mamendaklir parnoki tazükba ajak magizüker. Iba tetezü parnok nükdang kechi junger ta bilemer aji inyaker. Parnoki parnok alizüng ayur, parnok nungdaktem yanglur aser Tsüngrem dang moajang ta sarasadem. Khristan karbo Tsüngrem nungi talangka pilar alir aji saka parnoki sarasademtsü jangrar aser Tsüngrem dang parnoki merangba nung moajang ta asüngdang!

Na asoshi Tsüngremi mulungba lemang metettsüba Pai ne dang jungkai adoktsüba dang lir. Nai ibaji nai mulungba lemang nung kodanga mangutsü mesüra memetettsü. Kodang nai Tebu dang angashir, indangyongjisa ne taküm asoshi mapa kar: tashi angaba. Apijemtsü Shin züluri ashiba ama: "Shibai ozüng ayur pa tepelatsü."

Talila talubusa

Tang, asenok dak inyakba ain amato, shibai asenoki asüngdangba aser bilemba ajak dang kanga tali inyaksü akoker. Efesa 3:20.

Tsüngrem asoshi aser Pa arogo asoshi mapa meranga inyakba agi asenoki Tsüngrem peladaksür ta bilemer. Aji saka Tsüngremi nisung tesüngmangtsü ka yangluba nisung tejangraba agi Pa peladaksür (T.Ken 8:3-4). Tsüngremi na ajanga inyakba mapa dang nungi tuluba nai ne sasa ne alizüng ayutsü makok. Tangar dang nungi tali Tsüngrem peladaksütsü asoshi Tarsus nung Saul mapa tangar dangi tali pai meranga inyak, saka pai meranga inyak nung Tsüngremi pa taküm asoshi inyakba den medemdang dang pa mapaji jana rüja dang liasü ta pai bushitet. (Fil. 3:7-8).

Asenok tebilemstüji aseni yangluba sentong nunga aseni melamela jangratemer. Asenoki tamaren mapa inyaksü merangra asenok taküm nung tashi teperi akatsüla, iba jagi Tsüngremi asenok dang pelatsü ta bilemer. Tsüngrem nungi tajaba asenoki mangashi tashi asen taküm indang asenoki nükla dangi arutsü makok mesüra Tsüngremi asenok ajanga ataloktsütsü taaka bilemstü makok.

Asenoki bilemba dang nungi Tebui Pa aini asen tashi mait atendanga oa angur ta asenok sasa bilemtettsü tenüngdaksü lir. Asenoki asen tebilembaji tesülen yutsütsüla. Asenoki asen pungmangtem nung temulung süa malitsüla kechiaser itemji kechi koma jangratemtsü südir süang teti atema masü. Kodang asenoki Tsüngremi tuyuba nung odir asen taküm nung Tsüngrem mapa inyakba aseni metettsü aser ibaji Pa tashi ain dena aliba ajanga dang rasaa ashitsü akok. Ajak nung asenok koda temulung süa alitsü?

YSS ESSAY COMPETITION

Topic: KHRISTANI LONGKAK AITBA NUNG SHILEM AGITSÜ ASÜ MASÜ? **Shirnoki shilem agitsü?** – (a) Student (Doctoral student memelar) (b) Mapa inyaker kum 30 tekübok melar

Ojang kwi – 1500 - 1800
Submission – 20th November

Book Prize:

First – YSS Vol. 1 to 5 plus 5 NECU books (10 books)
Second – YSS Vol. 1 to 3, plus 4 NECU books (7 books)
Third – YSS Vol. 1 to 2, plus 2 NECU books (4 books)

Consolation

– One each copy of YSS Vol. 4 or 5

Temetettsü:

- Ao o nung züluba dang agizüktsü (Spelling Arok Osep 2019 agitsü)
- Eassyji YSS meyong akümstü aser YSS Vol. 6 nung adoktsü. Editortemi edit asütsü temelaba agütsütsüla.
- Tetendanger:** Mr. Tiatoshi Longkümer, KABA (9856587377), Rev. Temsüwati Kichu, MTBA (7005761441), Rev. Mapula Lemtur, Tuli (9612313753)
- Essay ajak wlongchar@gmail.com dangi yoktsü. Lanuri shilem agitsü ayongzük.

~ YSS TAYONGER

OLONG PAITEP # 5987

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

- 2. Auo nung chiyongtsü asenba - (7)
- 5. Mangyimba mapang - (5)
- 7. O tamendakdak - (4)
- 8. Pei dak malangba - (7)
- 10. Juli - (7)
- 12. Sen ayudak - (7)
- 14. Tenük agi ajitet - (4)
- 15. Tamajung aküm - (5)
- 16. Apuso - (7)

LANGTSÜNGLEN

- 1. Lenmang - (7)
- 2. Aor kidong ka tenüng - (6)
- 3. Tenarong maten - (6)
- 4. A _ _ _ g - (3)
- 6. Mopung apodoka - (7)
- ola adokdaksüba - (3)
- 9. Tongtipang tagitsü - (7)
- 10. Menungra bilem - (6)
- 11. Aiür - (6)
- 13. S _ _ _ k - (3)
- 14. T _ _ _ r - (3)

OLONG PAITEP # 5986 TELANGZÜBA


TIPIEN :

- 1. Yiar, 3. Tesola, 7. Yimra, 8. Tangar,
- 9. Peria, 10. Tanur, 11. Taseñ, 13. Lemjem,
- 15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka,
- 6. Satan, 9. Putet, 10. Tembar,
- 11. Tatok, 12. Amang, 14. Jala.

Noksa nung meputepi aliba 10 bushiang



TANÜBO NAI LANGZÜANG

- Q. Koba Union Ministry ajanga 'Deep Dive Online Training program' tenzüksü?
 [A] Ministry of Finance
 [B] Ministry of Electronics and IT
 [C] Ministry of Housing and Urban Affairs
 [D] Ministry of Rural Development

===== (Taruba adok nung onoki langzüksü)
YASHI ADOK TELANGZÜBA : Uzbekistan

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Lenkong

- (n) lenmang temesü (narrow path)
- * Lenkong nung khu bener kanga timtema jajar.

Lenku

- (n) Lenmang meyipdak, len akudak (road turning)
- * Lenku nung gari kanga kümdanga anitsüla.

NAI-A YA METETTER MA

November 2021' Ita Netflix Sabang Nung Sayatsü Aliba Movie aser Series Kar:

- A Cop Movie - Netflix Documentary
- Glória - Netflix Series
- Meenakshi Sundareshwar - Netflix Film
- Narcos: Mexico: Season 3 - Netflix Series
- The Unlikely Murderer - Netflix Series
- Yara - Netflix Film
- Zero to Hero - Netflix Film
- Arcane - Netflix Series (New Episodes Weekly)
- Father Christmas Is Back - Netflix Film
- Swap Shop - Netflix Series
- Your Life Is a Joke - Netflix Comedy
- Animal - Netflix Documentary
- Gentefied: Season 2 - Netflix Series
- Passing - Netflix Film
- Love Never Lies - Netflix Series
- Legacies: Season 3 (New Episodes)
- Red Notice - Netflix Film
- Mariah Carey's All I Want For Christmas Is You
- America's Next Top Model: Seasons 21-22
- Snowbound for Christmas
- Christmas Flow - Netflix Series
- Supergirl: Season 6 (New Episodes)
- Tiger King 2 - Netflix Documentary
- The Princess Switch 3: Romancing the Star - Netflix Film
- Blown Away: Christmas - Netflix Series
- Cowboy Bebop - Netflix Series
- Dhamaka - Netflix Film
- Masters of the Universe: Revelation: Part 2 - Netflix Series
- A Boy Called Christmas - Netflix Film
- School of Chocolate - Netflix Series
- Elves - Netflix Series
- The Summit of the Gods - Netflix Film

SUDOKU # 6028

	8	1								
	9	7		8	1					
		6	7	9	3	1		4		
9		5	6	2						
6	4		1			8				
					5	7	9	6		
	2		8							
	6	9				3	8			
5					4		2			

TELANGZÜBA # 6027

4	7	6	5	2	8	1	9	3
2	8	1	7	9	3	4	5	6
9	3	5	1	4	6	8	2	7
7	9	8	6	5	2	3	1	4
1	5	4	8	3	9	6	7	2
6	2	3	4	1	7	5	8	9
8	4	2	9	6	5	7	3	1
5	6	9	3	7	1	2	4	8
3	1	7	2	8	4	9	6	5

OJANG LUTEP # 5574

KTIASNYÜ	:								
JBIREM	:								
BBIEMLA	:								
AIGJ	:								
APMA	:								
OTMSAÜ	:								
AUÜNNSG	:								
IAKNY	:								
ENKZTÜ	:								
AGBJUNAT	:								

OJANG LUTEP TELANGZÜBA # 5573

**NAI TULUKA AMAI BILEMAKA NÜBURTEM ASER
 TSÜNGREMI MEZÜNGOKRA IBAJI TATEMPANG**

TAN HOPTA ATEMA - KOMA SÜLA ?

- Q. Tazünger maliba aser tazüngerterem aliyonga tazüngerterem dang nungi tesayurtemang teimba aliba government school-tembo ajak shibang nunga koma süla ?

PM Modi-i J&K kübok Nowshera nung sepai den Diwali among



Nowshera, November 04, 2021: Brihostibarnü Jammu & Kashmir kübok Nowshera sector nung Ato kilonser, Narendra Modi-i sepaitem den külemi Diwali benjung amongdang sepaitem nem nanglong lema agütsüba noksa nung angur.

Nowshera/New Delhi, Yimpoksüi/November 04 (Agencies): Brihostibarnü Ato kilonser, Narendra Modi-i Jammu & Kashmir kübok Nowshera sector nung aliba sepaitem den külemi Diwali benjung mongogo.

Nowshera nung sepaitem den jembidang Ato kilonseri, sorkari linük nung peisasa raraba hadirtem yangluba jenjang tajungba akümtsü atema merangba den külemi arrtsülen connectivity tajungba akümtsü atema terenlok mapatem inyaker, ta metetdaksü.

"Ni Diwali shia asen arrtsü anüker sepaitem den külemi amonger. Tanü ni kü den India nunger crore aika indang

temoatsütem yangi aliba sepaitem atema bener arutsür," ta pai ashi.

"Nenok ajanga asen linük nung nübur ajak tesünep nung mejangteter aser benjung balala pelatepa mongteter," ta pai ashi.

Tamalen sepaitemi surgical strike aoba atema tenüngsang agüja Ato kilonseri, Jammu & Kashmir nung kiralongratsü atema aiben merangogo saka sepaitemi nokdangteter, ta ashi.

"Tamalenbo sepaitem atema raraba hadirtem alizüktsü atema küm aika agia liasü. Defence sector nung tangar dak memetalokba ajanga dang akhi inyakyim melenshitsu. Alima melenshiba

aser raraba jenjang melenshiba den liromedema asenoka melenshitsu," ta pai ashi.

"Arrtsülen aser tzüyimkümlen lenmang maliba tesemtem nunga tangbo gari lenmang lir aser optical fibres lir, aser ibaji ajanga sepaitem jenjang tajungba akümer," ta pai ashi.

Ato kilonserisa sepaitem den sensaksem aser parnok nem nanglong lema agütsü.

Yaküm-a Modi-i Rajasthan kübok Longewala nung sepaitem den Diwali monga liasü aser 2019 küm nunga pai Jammu & Kashmir nung Rajouri district kübok Line of Control (LoC) nung sepaitem den Diwali monga liasü.

BJP-i yimsüsüba state 9 nunga Petrol/diesel jenjang ajemer

New Delhi, Yimpoksüi/November 04 (Agencies): Bodhbarnü Centre sorkari petrol aser diesel totzü jenjang ajemba sülen anogo ka dang lir Brihostibarnü BJP-i yimsüsüba state 9-ia petrol aser diesel jenjang ajemtsü, ta sangdongogo.

BJP-i yimsüsüba state temji Assam, Tripura, Manipur, Karnataka, Goa, Uttar Pradesh, Gujarat, Himachal Pradesh aser Uttarakhand state tem lir.

Bodhbarnü Centre sorkari petrol litre shia nung saru sen 5 aser diesel litre shia nung saru sen 10 ajemtsü, ta sangdongba sülen Diwali anogo- Brihostibar nungi totzü jenjang ajemer ayoker.

Assam, Tripura, Manipur, Karnataka aser Goa densema state kari petrol aser diesel naprongla litre shia nung sen 7 ajemogo.

Uttarakhand Chief Minister, Pushkar Singh Dhami-i sorkari petrol saru- Value Added Tax (VAT) litre nung sen 2 ajemtsü ta metetdaksü aser Himachal Pradesh Chief Minister Jairam Thakur-i sorkari petrol aser diesel naprongla nung VAT saru ajemtsü, ta metetdaksü.

Bodhbarnü Tripura Chief Minister, Biplab Deb-i, "Ato kilonser @narendramodi-i aniba Centre sorkari petrol & diesel saru ajemtsü atema telemtetba agiba sülen Tripura sorkaria asüing (Brihostibar) nungi petrol & diesel litre shia nung sen 7 ajemtsü," ta metetdakja liasü.

Tesüiba ita ishika tsüingda India nung petrol aser diesel jenjang kanga atuba sülen state kar nungbo petrol litre nung sen 120 tashi agi ayoker aser state aika nung diesel-a litre nung sen 100 tashi akümiba agi nüburtem, talisa sensakertem kanga mejungi kongshi.

Tang linük yimtiba Delhi nung Petrol litre nung sen 103.97 dang kümogo aser Diesel litre nung sen 86.67 dang kümogo.

Mumbai nunga petrol litre nung sen 109, Kolkata nung 104.67, Chennai nung sen 101.40 aser Bengaluru nunga petrol litre ka nung sen 107.64 dang kümogo.

Centre sorkari saru kasa ajemyonga state shia VAT saru balala asüba agi state shia nung petrol aser diesel totzü jenjang balala.



November 04, 2021 nü London nung United Kingdom Chancellor, Rishi Sunak-i Mahatma Gandhi nungtem nung senjang tasen ka sayatsüdang tangokba noksa nung angur.

India nung anonisung 12,885 dak Covid putet aser 461 asü

New Delhi, November 04 (Agencies): India nung anonisung 12,885 dak coronavirus tashidak putet aser iba tashidak agi shiranger 461 süogo, ta Brihostibarnü Union Health Ministry-i metetdaksü.

Tang linük nung coronavirus agi teshirangdakpur 1,48,579 lir

aser ibaji tesüiba anogo 253 tsüingda teshirangdakpur ishitiba lir.

Tesüiba ghonda 24 tsüingda coronavirus agi shiranger 15,054 anepogo aser tang tashi nung shiranger anepba shilem 98.23 jungogo (nisung 3,37,12,794 anep).

Tang India nung anogo shia coronavirus positive

putetba shilem 1.21 dang kümogo aser hopta shia positive putetba shilem 1.17 dang kümogo.

Linük nung samples ajak senteper crore 61.23 tendangogo aser coronavirus vaccine dose crore 107 dak tema agütsüogo, ta Ministry of health & family welfare-isa metetdaksü.



November 04, 2021 nü Navi Mumbai nung Lakshmi Puja anogomong nung APMC Market nung shishilembartemi 'ledger' kaket aliba noksa nung angur.

Petrol nung sen 50 ajemtsü atema BJP tamakok ngudaktsütsüla: Raut

Mumbai, November 04 (Agencies): Centre sorkari petrol litre shia nung sen 5 aser diesel litre shia nung sen 10 ajemba sülen anogo ka lir Brihostibarnü Shiv Sena MP, Sanjay Raut-i, petrol litre nung sen 50 tashi ajemtsü atema BJP tamakok ngudaktsütsüla, ta ashi.

Osangbenertem den jembidang Centre sorkar aija Raut-i, totzü litre nung sen 5 ajemba jagi kecha masütsü, shidakba agibo mezünyongi sen 25 bosa ajemtsüla, iba sülen sen 50 tashi ajemtsüla, ta ashi.

"By election nung BJP-i tamakok anguba agi Centre-i totzü saru sen 5 ajemogo. Totzü jenjang sen 50 tashi ajemtsü atema BJP meshimeshia tamakok ngudaktsütsüla," ta pai ashi.

Rajya Sabha MP, Raut-isa, osettsüset nung jenjang kanga

atuba agi nüburtemi sen apoba sülen ang Diwali amonger aser benjung mopungsem mali, ta ashi.

October 30 nü by election agia election osang sangdongogo. BJP-i Himachal Pradesh nung assembly menden asem aser Mandi Lok Sabha menden ka nung tamakok ngua liasü.

BJP-isa Maharashtra kübok Delgur Assembly by election nung tamakok angu aser Dadra & Nagar Haveli Lok Sabha menden nunga tamakok angu.

Ano tanga osang ka nung, Brihostibarnü Congress General Secretary, Priyanka Gandhi Vadra-i, assembly elections agitsü mapang ana nung aliba agi BJP-i tetsübu nung petrol aser diesel saru ajemtsü atema telemtetba agi, ta aitsü.

(Maneni tapak 9 nung...)



Mexico City nung hopta tatemlen Mexico Grand Prix alitsü lia Paseo de la Reforma nung Mexican Formula One exhibition aliba temdangsünangtsü tebilemba nung tetsür temeden busema longkak aiterem police-i nokdangba noksa ka yangi angur.

Siberia nung oset abenba tayimtsü ka tsükok

Irkutsk, Yimpoksüi/Nov. 04 (Agencies): Belarus meyong oset abenba tayimtsü ka Russia künok Irkutsk yimti tezülen radar nungi samaba sülen Siberia nung anendang tsükoka liasü, aser yangji nisung aika asü, ta ketdangsürtemi ashi.

Russia indang federal aviation agency Rosaviatsiya ajanga ashiba agi, Belarusan company Grodno meyong Antonov An-12 tayimtsü ya ali nung anentsü atema mezüng aruba sülen longzua liasü aser iba mapang osangtsüsang agitepba sama.

"Iba lendong nungya tia maka tayimtsü nung mena alir ajak asü," ta Irkutsk regional governor Igor Kobzev-i ashi.

Iba tayimtsü nungya Belarusan nung tayimtsü ketdangsür takotet asem, Russia nung

ana, Ukraine nung ana liasü, aser parnok ajak asü aser tayimtsü nung oset kecha bena meliasü, ta Belarusan ketdangsürtemi ashi.

Iba tayimtsü nungya passenger ana liasü, ta Russian ketdangsürtemi tatsüka lir ashi.

Iba tayimtsü ya tzüngsang mejungi lia senzua liasü, ta Belarussian transport ministry ajanga ashi.

Lendong atalokba tesem nung tangokba video nung tekumzüker temi aonung rer laa alidak tayimtsü nung mi remseptsü meranga liasü. Yangji aliba Russian Investigative Committee ajanga transport safety rules nung aibelenba anema ken o bushisüngdang tenzükogo, ta ashi.

Antonov aircraft ya Soviet nung mapang yanglu aser

civilian aser mitkartem senzüsempogtsü atema taoba Soviet Union ajanga tang tashi amshia arur. Tesüiba küm ishika tsüngta iba tayimtsü ya lendong aika ajurua arur.

Iba tayimtsü ya mapang ka lendong ajuruba nung nüngtugu liasü, aser Russia nung airlines tulutem Soviet aircraft tejentem melena tasen yanglu.

Saka junga anepalu masüba aser safety standard mamshiba lir, aser iba linük nung tayimtsü lendong aika ajurua arur.

September ita An-26 transport aircraft ka linük anüdoklen Khabarovsk yimti nung tsükoka nisung trok asü.

July ita Kamchatka Peninsula alema An-26 tayimtsü ka yima aoba mapang tsükoka yangji mena alir nisung 28 prong asü.

Democratic Republic of Congo nung kanga sashia khatep

Bukavu, Yimpoksüi/Nov. 04 (Agencies): Mejangjaba nisungtemi Democratic Republic of the Congo (DRC) anüdoklen Bukavu yimti nung aonung arua amakba ajanga anepdang tashi khatepa liasü.

Khatepba mapang lendong agütsür nisung trok, police ana aser sepai ka asü, ta South Kivu Governor Theo Ngwabidje-i osangbener dang Bodhbarnü ashi.

Yimti nung tesem kar nung prangbong ola ya Mongulbarnep 1:45 ako (par mapang) meta angashia liasü, saka nikongdang tashinung khatepba anen, ta osangtem ajanga ashir.

"Tensa azüoka lir. Police station kar nung tenük yoker amaker jangjatetsü asoshi bushisüngdang tenzükogo," ta Kasi-i ashi.

Iba region indang mitkar lenir Bob Kilubi Ngoy-i ashiba agi, anogo ishika tejakdang police temi pua aliba nisung kar chiokdaksütsü atema iba telok yagi bushia liasü.

Nok-o-nü auyatsü mechi iba telok yagi mitkar aliba tesem ka amak saka parnok meyipa yok aser iba sülen parnok jila tiyongleni ao, saka parnok aridok, ta pai ashi.

"Parnoki külem züngsemtep pua aliba chioktsü meranga liasü. Parnoki amang nung amak aser teraksa tulu nungi kumzüktsü asoshi onoki

azüoktsü merang. Anü adokba sülen mitkartemi operation tesashiba tenzükner," ta Ngoy-i ashi.

Ketdangsürtemi lendong agütsür 36 apu aser prangbong 14 ngutet, ta ashi. Pua alirtem ya timba tanur, tetsüng tesa aser civilian süoshi semer liasü.

DRC yimtiba, Kinshasa nung aliba United Nations peacekeeping force temi South Kivu province nung ketdangsürtem den osangtsüsang agiteper, ta ashi. "Jila tezülen, Walungu, Kavumu aser Nyangezi tsütsü tongtipang lenmang asem nung long-range patrols tenzükogo," ta MONUSCO odongtar Mathias Gillmann-i ashi.

DRC anüdoklen telungpur telok 120 dak tema lir aser parnok ya aika küm 25 shi jakdang regional war tem nung shilem agia liasü.

South Kivu, koba Rwanda aser Burundi den arütsü nung lir, yangji item telungpurtemi kanga sashia lendong agütsür, saka 2017 küm November ita sülenbo lendong tulutibaji Bukavu nung atalokba ya alitsü.

May ita tetenzüklen ano timtem nung aliba province ana - North Kivu aser Ituri - ya "stage of siege" kübok yua telungpur anema mera tesashi agitsü atema senior civilian post tem security forces küboki aitdaksü.

Linük aikati mijang amshiba anentsü renemer

Glasgow, Yimpoksüi/Nov. 04 (Agencies): Poland, Vietnam aser Chile den ano danga linüktemi tang mezüngbuba mijang (coal) amshia power adokdaksüba aser plant tasen yangluba anentsü nangzükba sülen, mijang amshiba anentsü anasai arur, ta British sorkari ashi.

British-i ayongba COP26 ajanga Bodhbarnü menur sangdong ka nung ashiba agi, linük tasentemi iba tezüngzüktep nung meyongnem agütsüba ajanga iba totzü amshiba anentsü asoshi züngzükteper linük aser lokti tentet 190 alitsü.

Tzü-mopung menentsüba fossil fuel rongnung mijang ya tamajungtiba lir, aser alima nung tzü-mopung tatsükba akumba nung iba mijang arongba nungi greenhouse gas adokba yagi shilem tulutiba agir.

Alima rangpen nung tzü-mopung wazüka ayutsü asoshi nükjidong ayuba nung mijang mamshitsü yimya süpaba ya tongtipang lir, koba agi lendong-tsüdong tulu nungi jenbua alitsü asoshi 1.5 degrees Celsius (34.7 Fahrenheit) tashi temokongba kumdaksütsü.

British sorkari ashiba agi, COP26 agreement nung meyongnem agütsürtem yagi pei-pe linük aser bendang lima nung coal power generation nung senotsü indokba ajak anentsü aser power temürek atema tekeraba nung mera agitsü dena lir.

Shilem agiba linüktemi 2030s nung economies tulu atema coal power ajemdaksütsü aser 2040s nung economies tila atema iba coal power amshiba ajemdaksütsü meranger.

"Mijang amshiba anentsü asenoki angur. Alima tim lenmang nung jajar, mijang amshiba anentsü renema lir aser lipajen aser rongsenketzüng ajangzuka tarutsü asoshi clean energy yanglutsü meranger," ta British business and energy secretary, Kwasi Kwarteng-i ashi.

Ano mijang amshiba anendaksütsü nükjidong nung alima ajunga nung campaign aliba, Powering Past Coal Alliance ajanga ashiba agi, 2035 tashinung mijang amshiba anentsü nangzükter züngsem tasen 28 lir aser yangji Ukraine densema lir.

Taoba küm Ukraine indang power shilem asem shi mijang nungi adoka liasü.

United Kingdom, Germany aser Ireland densema taka-tait anüolen linüktemi alima atsükba bilema mijang nung ajemdaker power generation ajema amshia arur.

Saka 2019 küm alima nung electricity shilem 37 shi mijang nungi adoka liasü, aser mijang langlamba aser talubosa anguba ajanga South Africa, Poland aser India densema linük aika nung iba ya bulua amshir.

Item linük nung libajen memeneni power adokdaksütsü aser industry atema senotsü jenti indoktsüsa akumer.

China, India, Vietnam aser Indonesia linüktem nung coal plant tasen amenoktsü sentong lir, saka alima nung coal power project tem ajema kumdaki.

COP26 coal phase-out pledge nung item linüktem ya dena alia maliar mesüra Vietnam-i nangzükba ajanga coal project yanglutsü aliba nung kongshitsü asü masüar UK-i mashi.

September ita China-i danga lima nung coal plant tem atema

senotsü agütsüba anentsü, ta shia lir, saka iba tezüngzüktep yagi par linük nung aliba project tem nung mokongshir.

Australia ya tesülen atsüngzuka lir, kechiaser linüki maneni coal project nung sen indoker, ta Australian National University nung tzü-mopung melenba tsütsü takotet, Will Steffen-i ashi.

"Tia maka asen sorkarbo coal industry tuluba kumdaksür. Küm 25 mesüra talila atema sorkari coal mines tasentem lapoker," ta Steffen-i osangbener dang ashi. "Asenoki iba ya maneni inyaknungbo, Paris climate goals metongtetsü."

Mija mamshitsü nangzükba meina COP26 ajanga Brehostibarnü senotsü indoktsü osangtem sangdongtsü imla lir, koba ajanga clean power nung sen indoktsü, pei takum alitsü atema coal sector nung metaloka aliba region aser yangji inyakertem yaritsü.

South Africa nung mijang amshiba maparen tekeratiba nung toktsütsü atema UK aser United States densema linük aikati Mongulbarnü COP26 mungdang nung sen billion \$8.5

indoktsü sangdonga liasü.

Linük 100 dak temai 2030 küm tashinung arem samadaksüba maparen anentsü nangzük aser arem wazüka ayuba aser arem tanaben adokdaksütsü atema sen billion \$19 indoktsü.

Glasgow nung COP26 tzü-mopung indang jembishinü senden nungi Hombarbü menur sandongba nungya Brazil, Russia, Indonesia aser Democratic Republic of the Congo lenirtemi nungiter. Alima nung aliba arem shilem 85 shi item linüktem meyoktepba agi ajunger.

Glasgow Leaders' Declaration on Forest and Land Use yagi arem tasazük square kilometres million 33 (13 million square miles) dak tali awajemtsü, ta lenirtem tenüng nung British ato kilonser indang office nungi sangdongba nung shia lir.

"Tzü-mopung madak takok angur ama mapang talangka nungi otsü yanglua aruba tembangtsü asenoki maongka angutsü, aser asen kibur akumtsü," ta Britain Ato Kilonser Boris Johnson-i ashi.

'Miss Mokokchung 2021' subtitles shimba sentong aka Miss Mokokchung 2021 Nov. 6 aonung shimtsü



November 04, 2021 : 'Miss Mokokchung 2021' sentong dak sentakba nung 4th Nov, 2021 nü Mokokchung P. Shilu Park nung subtitles shimtsü atema tetandangba ka agiogo. Taküm 'Miss Mokokchung 2021' ya Forerunners Mokokchung teloki ayonger aser iba tetoktepa nung kongrular parnok 11-i shilem agitsü renemdaki.

Taküm subtitles 5; Miss Beautiful body, Miss Beautiful Skin, Miss Photogenic, Miss Talented aser Miss Runway nungertem agütsütsü. Miss Talented shimba sentong 29th Oct, 2021 nüto agiogo aser tanü tanüngba subtitle shimba tetandangba agi.

Miss Mokokchung shimba sentong 6th Nov, 2021 nü nikongdang 5:00 ako nungi tenzüka Mokokchung town hall nung akatsü. Miss Mokokchung korang shibai bendir la nem tanga senpet den sen 50,000/-, 1st Runner up nem 30,000/- aser 2nd Runner Up nem 20,000/- agütsütsü. Miss Mokokchung title senpetji Mr & Mrs Imlikumzuk Imsong aser Mr & Mrs Rongsentushi Longkumer kibongi renemtsür aser 2nd

Runner Up senpetji Anchor Medical Store-i renemtsütsü, ta tayongertemi osangbener senden ka nung metetdaksü.

Miss Mokokchung shimba sentong nung MLA & Advisor, Dr. Neikiesalie Kire aser Youth Resource & Sports Director Akumla Chuba na tetushi tesemdanger asütsü jaoka lir. Iba aonung artist tangalen nungi Aloba Naga aser Elementz, aser Mokokchung nungi Wapang Longkumer (Naga Orpheus Hunt), Jungshi Wallinger, Imkummaro, Odikokla aser Akumsen nungertemi shilem agitsü, ta jangjaogo. Moalemla Aier-i iba aonung sentong len anitsü.

Miss Mokokchung sentong nung show director & choreographer-ji taoba Mr. Northeast - Sanjeev Tamang lir aser Make-up Artist & Hair Stylist-ji Christy Tsanglao L. Thonger. Tanü subtitles shimba sentong nung tetendangertemji; Sanjeev Tamang den taoba beauty pageant Imlibenla Wati aser Sashinunla Nathan par asem liasü. Tanü agiba tetendangbatemji Miss

Mokokchung shimba aonung osang metetdaksütsü aser takoker nem senpet balala agi senpettsütsü.

Beti Bachao, Beti Padhao (BBBP)-ia taküm Miss Mokokchung sentong nung yariteper (co-powered by BBBP) aser taküm Miss Mokokchung shiba adokdir laji BBBP Mokokchung district atema ambassador asütsü, ta metetdaksü.

MM sentong atema ticket jenjang yamai alitsü; donors Rs. 1000/- (admit 3), Rs. 500/- (admit 2) aser Rs. 200/- (admit 1) aser ticket-ji The Restaurant aser iba aonungjia ticket counter nung angutsü mesüra 8258078112 ajanga tongtepratepsü akok.

Jangratemtsü osang tajung kaji taküm Miss Mokokchung nungi tajangzük anguba senji Mokokchung Covid Hospital nem tenlatsü aser iba sentong Covid-19 SOP nung ajemdaker akatsü, ta tayongertemi metetdaksü. Lokti atema mapa tajung ka inyaksü meranger, anungji, ajaki arua iba show repringtsü ayongzük, ta parnokisa metetdaksü.

TaFMA-i 'November Blooms' sentong ayongzüktsü



Dimapur, Yimpoksüi/ November 04, 2021 (TYO): TaFMA-i November Blooms 2021 ayongzüktsü terenemba lir. Art & Entertainment, Business, Community Fair dena aliba sentong ya hopta tatemlen Honibar shia (November 6, 13,

20, 27) ayonga agiba sentong ka asütsü, ta sangdong ajanga metetdaksü.

Iba sentong ya RCEMPA, Jotsoma, Kohima nung nikongdang 3:00 ako nungi tenzüksü aser aruya Honibarnü (06.11.2021) iba sentong agitsü

renema lir.

November Blooms ya Imagi.Nation den TaFMA longjemer tenzüka mapatong ka asütsü. December ita agitsü aliba Hornbill Festival atongtsü lia carnival maparen tali tepor jungdaksütsü asoshi iba sentong agir.

Local brand, entrepreneur aser business tem maparen karadaksütsü atema sabang ka agütsütsü nukla yur, parnok den longjemer November Blooms agitsü. Iba sentong nung audience dang local brand product, chiyongtsü tajung, artists, entertainment aser tasa balala amshia yangluba sentong tem sayutsü. Art, fashion, chiyongtsü aser music sapurtemi November Blooms nung tajangshiba tasen aika angutsü. Item maparen takok ngua achaayangtsü aser nübur ajak aruagi adentsü asoshi mepishir, ta kasa sangdong ajanga metetdaksü.



Foodie's World®

B N Resto

Longkumer Kilem

NOW RECRUITING FOR MOKOKCHUNG (NAGALAND)

Ref.no. FWD/NL/101-2021

Date 04.11.2021

Foodie's World: North-East's based fastest growing Fast Food chain and B N Resto is recruiting for its 1st outlet in Mokokchung, Nagaland.

JOB OPENING

Manager: 1 Post Graduate/Degree/Diploma in Hospitality with Computer skills.

Restaurant staff: 5 Post Minimum class 10 pass and above/ preferably with two wheeler.

Both Experienced and Fresher's may apply.

Gender no Bar.

Applicants may forward their Resume/CV to bnresto.foodiesworld@gmail.com

Contact no: 7005388966 / 8131860987

Time: 10:00 am - 4:00 pm.

Selected candidates will undergo one month of training.

Last date of submission 15.11.2021

ASLB SANGDONG

Taoba mapang (10-10-2021) Sangdonga aliba ama Ao Senden Literature Board-i achaayanga agiba Arangtet Tatidang 2021 Yimpoksüi 24-26 tsüingda Covid-19, SOP agi melaba kübok agüja aliba tesemtem nung agitsü metetdaksü.

- a) Mokokchung : Govt. Middle School Senkalemba, Arkong Ward (Near Ongpangkong Salang)
- b) Kohima : KABA, Chandmari Fellowship S.S Hall
- c) Dimapur : Dimapur Mission Hr. Secondary School

Temetetsü kar:

- a) Admit Card Mokokchung nung agütsütsüpur Yimpoksüi 22-23, 2021 tsüingda office mapang nung angutsü.
- b) Kohima aser Dimapur nung agütsütsüpurtem tatidang agitsüba anepdang 9:00-9:30 ako tsüingda nungzülu agia Admit Card agizüktsü.
- c) Anogo shia tatidang mapang anepdang 10:00-1:00 pm tashi alitsü.
- d) Tatidang paper mezüing anepdang Paper I, tanabuba anepdang Paper II aser tasembuba anepdang Paper III ta alitsü.
- e) Alima tensa tia aser wara mopung ajanga ajongben temelenshi kar adokra office ajanga metetdaksütsü.
- f) Arangtet Tenren 2019-2020 (Syllabus) nung temelenshi kar lir anungji tatidang agütsütsüpur ajaki 2021 Tenren office den tongtepratepa meshia amshitsüla.

Sd/-
(Prof. Rev. Rongsen Longkumer)
Convenor ASLB/AC

Sd/-
(I. Temjen Tzüdir)
Secretary ASLB/AC

CISF Unit-i Doyang nung food carnival ka ayongzük

Wokha, Yimpoksüi/ November 04, 2021 (TYO): Lisopur den tesendaktep tajung yanglutsü aser Doyang nung alir sobaliba/inyakyim metetta alitsü asoshi, Deobarnü (31.10.2021) CISF Unit DHEP Doyang, Wokha ajanga food carnival sentong ka ayongzük, ta sangdong ajanga metetdaksü.

Iba carnival sentong nung, CISF sepai kinungtsü temi sorchiok aser 'parnok o talir' tsüingda tajangzük mesüra takoksa mangutsüsa, chiyongtsütem jenjang dalang agi yoka liasü, kong nübur ajak atema iba carnival lapoktsü.

CISF Unit DHEP Doyang ajanga ayongba carnival

sentong nung, NEEPCO LTD. indang kibongtem aser staff, VKV Doyang aser Doyang nung alirtem dena liasü.

Iba carnival atema tesem balala indang chiyongtsü balala renem aser item chiyongtsü yoka liasü, kong carnival-i arur ajaki chiyongtsü tapu balala alia jangratema chia-jema liasü. Iba sentong takok ngua ayongzükba atema carnival nung adener ajaki CISF dang pelaba metetdaksü.

Tesem balala nungi arur nüburtem tsüingda tesendaktep tajung aser yimji-yimjung alitsü asoshi, tarutsü nunga CISF-i iba ama sentong ayongzüktsü nangzükogo, ta kasa sangdong ajanga metetdaksü.

Petrol nung sen 50 ajemtsü... (Tapak 7 nungi...)

"Temeim agi masü saka Sabha menden 3 by election tetsübu ajanga iba telemtetba osang ajanga telangzüba tajung agi. Vasooli sorkari ayaba ka nguogo. Centre sorkari taaji taruba elections nung petrol aser diesel nung saru parnoki meyipa angutsü," ta lai ajemogo!" ta metetdaksü.

Twitter ajanga metetdaksü. Ano külen taoba mapang Union Minister aser Congress lenir tain, P Chidambaram-ia BJP aija, assembly menden 30 aser Lok Sabha menden asem by election osang ajanga telangzüba tajung ka nguogo, ta ashi.

Pai twitter ajanga, "Assembly menden 30 aser Lok

Sabha menden 3 by election osang ajanga telangzüba tajung petrol aser diesel nung saru ajemogo!" ta metetdaksü.

"Totzü jenjang tali akümbaji saru tali agiba agi lir, aser totzü saru tali akümbaji Centre sorkari merumeroba ajanga lir," ta taoba mapang Union finance minister-isa ametetdaksü.

Tawa by elections nung BJP-i menden 7 nung takok angu aser Congress Party-i menden 8 nung takok ngua liasü.

Syed Mushtaq Ali Trophy: Nagaland-i Manipur kokogo



Dimapur, Yimpoksüi/ November 04, 2021 (TYO): Brehostibarnü, ACA Stadium, Mangalagiri, Vijayawada nung Nagaland aser Manipur tsüingda Syed Mushtaq Ali Trophy asaya liasü. Iba asaya nung Nagaland Senior Men's team-i Manipur madak run 17 agi takok angu.

Nagaland-i toss koka batting shim aser latetja aliba over 20 nung team-i run 150 yanglutet aser batter 3 out asü.

Iba asaya nung, Nagaland team nungi opener tem kara out süadok, kong opener Jonathan Rongsen aser Sedezhalie Rupreo nati run aika meyanglutet aser Manipur nungi bowler Rex-i tenaprongla out sütsü. Wicket-keeper batsman Chetan Bist aser Shrikant Mundhe nati junga asaya liasü. Chetan-i 4' asem aser 6' ana densema ball 48 nung run 66 yanglutet. Ajisüaka, Mundhe half century meyanglutetti run

42 alidang Rex-isa pa out sütsü. Nagaland atema Hokaito Zhimomi-i ball 24 nung run 35 bendenloksü. Hokaito-i 4' asem aser 6' ka züklojka liasü.

Kasa asaya tanabuba innings nung, Manipur team-i run 17 agi alizüing metongtet. Over 20 nung Manipur batter 6 tashi out süadok. Nagaland nungi bowler Abu Nechim (2/

19) aser Khrievitso Kense (2/22) nati wicket anana agi. Külem team pur Nagaho aser Mundhe nati wicket ka ka agia liasü.

Hokolbar nikongdang 1:00 ako meta Gokaraju Liala Gangaaraju ACA Cricket Ground, Mulapadu nung Nagaland aser Vidarbha na asayatsü.

*** Senior Women's One Day Trophy 2021-22 Nagaland-i Arunachal madak wicket 9 agi takok angu.**

Brehostibarnü, Eden Garden, Kolkata nung Nagaland aser Arunachal tetsür team tsüingda asayaogo.

Toss makokba sülen, Nagaland team nem fielding lemezüksü, kong over 48 nung parnoki Arunachal batter ajak run 95 nung out sütsü aser extra run 7 dang agütsü.

Nagaland nungi Poonam Khemnar-i wicket 3 (3/20) agi. Kiran Navgire-i wicket 2 (2/7),

Limatola aser Merensola nati wicket ka ka out sütsü.

Tanabuba innings nung, Nagaland-i ayong ayonga dang over 15.3 nung iba asaya koktet. Gautami Naik-i run 39 yanglu aser la out süadok. Poonam Khemnar-i run 29* aser Sentilemla-i run 20* bendenlojka liasü.

Honibar (06.11.2021) anepdang 9:00 ako meta 22 Yards, Salt Lake, Kolkata nung Nagaland aser Bihar asayatsü.

21buba NSF Martyrs' Memorial Trophy: Headhunters final-i iogo



Kohima, Yimpoksüi/ November 4, 2021 (TYO): Angami Students' Union ajanga IG Stadium nung ayongba 21st NSF Martyrs' Memorial Trophy asayamung nung Headhunters Jakhama-i semi-final takok ngua final tongtetogo.

Iba asayamung tanabuba semi-final match nung Headhunters aser FIFA FC na asaya liasü. Headhunters nung Jakhama, Kohima nung alir territorial army tem dena lir aser parnok final tongtetsü atema goal 2-1 agi FIFA FC tsükdaksü.

Iba asaya nung team anaprongla kasa shi toktepa asayaogo aser telok kati dang goal meinoktsüteti asaya alidang, mezüing half atemtsü

minute ishika lia Headhunters atema Haotinmang (5)-i goal ka idaktsü. Break sülen minute 60buba nung Chingsha Phom (10)-i Headhunters atema goal tanabuba bendenloksü.

Kasa match nung FIFA FC-ia maneni Headhunters den toktepa asaya aser; iba asaya atemtsü minute 15 lia penalty

ka metsütsü parnoki maongka tajung angu saka Ngugoulal-i iba penalty metsüpet. Minute 87buba nung Maibam Lanchenba-i goal ka inoktsü, saka FIFA FC puri goal tanabuba idaktsütsü asoshi mapang süiadoker liasü.

Asaya dak mapet yimya beshiba atema, Headhunters indang Mecievikho (34) aser FIFA FC nungi Mangkhohao naprongla nem yellow card agütsü.

Iba asayamung semi final nung Project Director DRDA, Dimapur Kethosituo Sekhose aruagi denogo. Kasa mapang, Neikezolie Pienyü-i ken ka tena liasü.

* Honibar (06.11.2021) aonung 5:30 ako meta Headhunters FC aser Mhakenyi Kro-u tsüingda final asayatsü.

Tanü All Nagaland Inter Dist. Volleyball organising committee senden amentsü

Kohima, Yimpoksüi/ November 04, 2021 (TYO): Hokolbar (05.11.2021) nikongdang 2:00 ako meta DC Office, Kohima nung All Nagaland Inter District Volleyball Tournament 2021

indang organising committee pur 1buba senden amentsü.

Anungji, iba senden nung züingsem ajak medema aruagi adentsü asoshi mepishir, ta sangdong ka ajanga metetdaksü.

Tapak 1 nungi...

Pfutsero nung nija meyong mozüki tajung ka lapokogo

Iba constituency nung MLA ka ama ano senotsü rizünga ayutsü atema nationalized bank tem bener arutsü akok tashi inyakteper, ta pai ashi.

Phek district nung terenlok mapa atema state sorkari nendaka inyaker, aser iba yongji lenmang aser danga terenlok mapatem Pfutsero aser district nung danga tesemtem tonga arur, ta Minister-i ashi.

Iba atema constituency aser district nung aliba nüburtemi sorkar maparen takok ngua inyaktsü asoshi yariteptsüla aser amalitep alitsüla, ta pai ayongzüka liasü.

Iba constituency nungi asemben tashi MLA shimsang, Kronu-isa nüburtem dang 2023 state general election nunga

maneni pa yaritsü ayongzüka liasü.

Mero Hospital indang Managing Director, Dr D K Mero-i ashiba agi, yipten 20 aliba mozüki nungya doctor pungo lir aser teshimtet anogotem nung Kohima nungi specialist tem angutsü.

Iba sentong nung Chakhesang Public Organization tir, Mikha Kenye; Chakhesang Mothers' Association tir, Zhonelü Tunyi aser Pfutsero Town Welfare Committee convener, Mezelo Lomi nungeria Asür L Mero aser Minister Kronu nem tentingsang agüja liasü.

Iba sentong nung Rev Z Mero-i mozüki ya meshiteta sarasademja liasü.

Chief Secretary-i KAAS Coffee farm semdang

Paisa, Nagaland nung tang ali hectar 10,000 nung coffee tsünüa lir aser 2030 tashi nungbo ali hectar 50,000 nung tsünütsü jenjang agidar. Land resource department-i coffee 27.5 metric tones South African company ka dangi yokogo, shirnok den Nagaland nung adokba coffee alizüksü atema küm 30 asoshi tenangzüktepa ka yangluogo, ta ashi.

Orthopaedic NHAK, HoD, Dr. G. Thong-i, Kebentsin Agri &

allied cooperative society (KAAS) Sendenyu village indang inyakyim metetdaksü. Paisa, Kebentsin Agri and allied society ya züingsem 25-i tentet aser club tentetba nükjidong tongtibangtibaji züingsemtem aser lokti nung nung ochishia mapa inyaksü ajungshitsü asoshi lir.

Maneni DPO, Kohima, Dr. Menuosietuo Tseikha-i coffee plantation cycle indang lemsatapa liasü.

BJP sorkari nüburtem tekangshi sentoka...

"Public Affairs Index 2021 (PAI) data ajanga Assam nung BJP-i yimsü asü tenzükba sülen state 18 rongnung Assam jenjang 14bubai asepsüka aluba sayuogo, koba shisabulutsüka aser Assam nungertem atema maksü lir," ta Assam Congress lenir Bobbeeta Sharma-i ashi.

Laisa, "BJP-i linük yimsü asüba mapang rongsenketzüng jenjang mejungi akümba den osettsüt nung jenjang tali akümba ajanga nüburtem anogoshi libaliro nung kanga mejungi kongshio," ta ashi.

Congress lenir Bobbeeta Sharma-isa, soseta asüba ken o timba kümyonga aoba atema centre aser state sorkar aitsüogo.

"NCRB data ajanga ashiba agi, aluyimertem soseta asüba 18% jungogo aser anogoshia aayanga chiyongertem küm nung soseta asüba 37666 jungogo aser kaketshirtem soseta asüba jenjang 21.20 kümogo," ta Sharma-i ashi.

"Covid tensa ajanga Assam nung nisung 3243 soseta asütsüsa aküm. 2019 nungi 2020 küm tashi nung soseta asüba jenjang shilem 36 agi timba kümogo. National Crime Records Bureau-i ashiba agi,

soseta asüba ken o dak sendakba nung state tem rongnung Assam jenjang 5buba nung lir. Ajisüaka BJP sorkari nüburtem atema süoki ia

mebilemer," ta lai ashi. Unemployment indang jembiba mapang Bobbeeta Sharma-i, chief minister Himanta Biswa Sarma lenisüba nung Assam sorkari tang tashi nung iba ken o bentettsü atema jenjang tapet agia mali, ta ashi.

"BJP-i sorkar kümtetba sülen state aser linük nung unemployment rate timba küm odar. Election matong tsüingda Chief Minister Dr Himanta Biswa Sarma-i mapa mongui aliba lanur lakh 25 nem mapa agütsütsü nangzük, saka iba ken o bentettsü atema jenjang agiba asenoki mangur. BJP-i lanurtem mejangjaba tarutsü kati anir odar," ta Bobbeeta-i ashi.

Maneni Congress leniri health sector nung state jenjang dak sendakba nung chief minister Himanta Biswa Sarma aitsüogo. "Assam Chief Minister Dr Himanta Biswa Sarma-i state nung terenlojki Ganga ayong ayimba ama asütsü ta jembir, saka pai mapang talangka achaayangba Health Department-a tekübokba jenjang nung lir," ta lai ashi.

"BJP sorkari teyazü tenangzükba agüja Assam nung aliba nüburtem ojang dak anisatsüla aser lenla ajak nung nüburtem ajangzüksü atema yimsü asü tenzüksü nungdaker," ta Bobbeeta Sharma-i Brehostibarnü ashi.

BILEMDANGANG

"Tejak repranga o bendangra, pei sasa pei aremstü kangla atur."